

Spirit of Bosnia / Duh Bosne

An International, Interdisciplinary, Bilingual, Online Journal
Međunarodni, interdisciplinarni, dvojezični, online časopis

Zimski Kadar

Saša Skenderija

Svu noć je padala kiša da bi jutros osvanuo prvi snijeg. Zato je u buffetu ugodno: možeš srkati toplu kavu i gledati kroz izlog na ulicu. Bjelina potcrtava oblike, pokrete, finu dnevnu mehaniku. Tu u bašti, gdje je ljetos bio razapet ogromni video-ekran, ostao je prazan čelični ram. U kadru, sasvim slučajnom, zima: oblak pare iz hotelske kuhinje, bijeli golf u rikvercu auspuhom raspršuje jato golubova, starica sa crvenim cekerom se kradom otklizuje na pločniku, tramvaji se mimoilaze pred kasarnom i, sasvim u kutu, neko pokunjeno dijete.

Namotava se vrpca dana, sama od sebe, bez vidljivog napora. Zamišljaš je beskonačnom. Na trenutak zaboraviš da još samo teža tvog vlastitog oka i prazni čelični ram drže tvoju zemlju na okupu.

© 2008 Saša Skenderija

The preceding text is copyright of the author and/or translator and is licensed under a Creative Commons Attribution-NonCommercial-NoDerivs 3.0 Unported License.